

敦夙好齋詩全集

敦夙好齋詩初編卷六

辛丑八月至
壬寅六月

漢陽葉名澧翰原著

南征集二

八月二十五日舟發章江

伯兄于役饒州約予同行至安仁縣境爲別

涼風起章貢倦客將北征扁舟薄暮發依依洪都城昨
來眾蟬噪寒露忽已零倚閭念白髮羈留何所營伯氏
惜分手送我江上行短晷不同駐旨酒聊同傾心隨浮
雲逝目極長江橫江流日東去滔滔非無情日落滕王
閣但見西山明裊裊復裊裊人事多迴縈奔走是吾分

羞懷兒女情

渡瑞洪渚

我行瑞洪渚觸目多災黎
濤瀾無涯岸室廬色慘悽
秋深潦未盡零雨休何時
慘慘積氣中晝夜蛟鼉馳
攸居眷陽鳥歸來將焉棲
流離忍復道跋涉我敢辭
風水異朝暮但恐舟行遲
卻望樵舍樹數點如鳧鷖
英雄視運會戰蹟安足悲

龍津

遠地江聲走淺沙
斜陽不斷亂飛鴉
秋光掩映烏篷外

一帶青山隔岸斜

石港別伯兄

八月三十日

揮淚又爲別淒涼正落暉江頭一以望去櫂復誰依秋
老關山迴天空木葉飛征裘衝雨雪日夜盼京畿

是夜舟泊石鼓灘寄懷伯兄

風急片帆斜維舟傍亂沙酒痕在襟袖夢醒各天涯秋
色催衰柏江聲帶晚鴉客懷難自遣撫鬢悵年華

貴谿

片舸泝貴谿晝夜靡停櫂獨客瞻河關坐送兩丸曜山

勢綿青紅森獐各殊貌未霜楓柏丹秋容蔚斜照巖際
猶冥濛雨意養羣竅城郭營魚鹽水市雜歌笑秋高干
象清異景觸羈眺

望象山

在貴谿縣西南八十里舊名應天山
宋陸文安公讀書其中因易名焉

文安昔講學交惟紫陽敦衛道一何勇阿附慚非倫驚
湖擁皋比相見互主賓一言義利界感泣傾士民後儒
立同異戈矛日紛紜讀書貴用世章句皆空言情哉五
論在靖康讐莫伸峩峩應天山石室埋荒雲寸心自仰
止淚落谿水濱

夜雨泊弋陽城外

荒城鳴木葉，况復雨風涼。
燭影照無寐，秋心入夜長。
寥寥聞吠犬，漠漠隱帆檣。
一艇親僮僕，勞人感異鄉。

弋陽弔宋謝文節公

崖山舟不復，卜肆抱孤忠。
一灑殘碑淚，能持國運終。
荒谿餘古木，故里滿悲風。
晞髮歌朱鳥，西臺浩氣同。

將至鉛山河口

盡日松杉外，舟行獨黯魂。
江風秋後熟，嵐色晚來昏。
地曠向居人，問津聞估客。
喧歸鴉飛，不斷蕭瑟幾家村。

河口晚望

鉛山河口一
名上饒江

上饒江北晚停橈
江口沙深未有潮
卻倚船窗望秋色
幾家寒竹雨瀟瀟

客路

客路秋方半
勞歌應未窮
黃垂平隴稻
紅點半林楓
江霧兼朝暮
山禽叫雨風
生涯休自卜
真意羨兒童

吾生

繫舟暫荒渚
聒耳滿風濤
寂寞無塵市
艱難得濁醪
遊魚尋隊密
去鳥戾天高
物理隨時見
吾生未是勞

焦石

居俗有陶穴荒茅覆短門江流晴轉碓山葉晝搖村農
圍家家築漁舟處處喧兒童依父老猶見古風存

大風夜泊焦石

客行值翼軫川路故多風

凡箕壁翼軫四宿之日主有風

況此涼秋夜

離人百感中湍聲催暮燭霜氣竦征鴻不覺重陽至清
尊孰與同

水碓

清川不里許水碓紛在望壘石以爲閘束灘未容放晝

夜無停機風轉自激盪舟行值犖帆送力莫暢坐使
川流竭溯洄失濤浪物情尙智巧爭競各不讓去權殊
逶遲客心益快悵

龍溪舟夜

舟泊蒼山下清秋夜景澄鴉歸村樹靜江暗暝烟增細
雨斜侵枕新蛾暗掠燈霜威何太早物候感相仍

明日
霜降

薄暮

水驛程難計蕭騷薄暮天輕霜浮短櫂遠樹合孤烟
樗子籠鷗去漁人網鯉旋菜莢負佳節作客信堪憐

沙谿

人家臨水驛對戶漲痕齊野渚秋花靜江樓宿霧低
沙時見鷺近市晚聞鷄昨我維舟處茫茫舊逕迷

玉山九日作

天寒識霜厲木落知秋晏遲遲江渚發冉冉物華變
客心軫良辰往景殷深眷去鳥無稅趾歸雲有餘戀
緒風授衣寒苦雨行歌倦餐眠改晦朔濤瀾異昏旦
黽勉趨前途踟躕寸心亂

九日懷張亨父

張郎與我經年別，遠道相思殊鬱陶。
蹤跡此生難自料，詩歌漫興尙堪豪。
楚江極目鴻聲怨，閩海驚心鶴唳勞。
今日孤舟愁倦客，不勝惆悵罷登高。

再寄張亨父

吾黨論詩傑如君，一代雄抗胸天下。
事獨振古賢風幾日辭，江渚于今定轉蓬。
聞亨父昨冬會至南昌長淮憐我去，淚灑

逝流東

謂四農師

玉山旅舍送人之河口

客舍暫相對，爲歡濁酒攜。
人隨陽鳥去，路指亂雲西。
官

波餘殘柳清燈待曙鷄扁舟吾亦具別汝數峯低

別玉山旅舍

尊酒主人意征途慰寂寥我今不復住長嘯狎風潮三
里灘前渡清秋有畫橈揚帆下天末不憚武林遙

屏風關

曉色溟濛撲客顏籃輿坐看雨餘山屏風關外秋光好
祇有飛禽共我閒

山中芙蓉盛開

平皋十里日華浮嵐氣濛濛曉未收無數芙蓉霜後好

空山惆悵不知秋

草坪

昨我六月來蟬鳴鬱炎暑今歸值清秋巖菊粲可數馳
驅復何爲荏苒歎時序廢驛今無人久忘戰事苦在昔
元明閒茲焉肅營伍休養當承平錐刀競商賈關門靜
無虞形勢聊仰俯天清霜氣高林茂禽鳥聚書生空往
還挾策走風雨

將至常山聞甯波告警

又報愁氛動金鷄

山名

恐莫支急須擒頡利未可禮卑彌

險阻難憑塹滄溟不限夷室家方再造復此痛流離

十一日舟發常山

東去錢塘七百遙江烟渚樹晚蕭蕭重來自爲名山好
誰共西湖問六橋

招募

招募傳

新詔兒童應共聞誰爲天下士早靖海西氛休養非今

日憂勞仰

聖君中原有鼙鼓一戰張吾軍

衢州府

我來常山縣欲行苦無船小船未可載大船輸私錢中
船插羽旗云欲備救援兩日點行畢我權何其艱日午
發山邑邁征夜及晨辛苦攜兩僕四望嗟無隣黯黯逝
鳥色離離丹橘村樹木豈有知鳥飛呼厥羣迢遞來衢
州始知消息真舟山殞三將食盡號孤軍葛公雲飛王
公錫鵬鄧公
鳴紹興至金華羽書馳紛紜浙河七百里蕭條稀行人
卽今城外船府帖昨日申贛州兵數百九江兵數千未
知到何日潛避將笞鞭前有急櫓來飄飄魂旒懸云是

部曲士授命金鷄山悽惻未暇問月照荒城烟

哀鄭總戎二首

國鴻

白日暗烽火崢嶸海氣昏又侵昌國衛竟陷竹山門五
日饑無食孤軍痛莫援父兄今僕射閒道裏尸奔

公殉難後

聞有麾下義勇徐某負戶逃歸已至蕭山矣

半歲籌邊苦窮知主客情拊膺常太息秉鉞孰專征全
郡威齊挫孤忠氣自明魂歸休灑淚入海戮鯢鯨

蘭谿

瑟瑟澗谿水涼風吹浪勻畫船充鐵騎死徙慟生民近

郭飛禽樂防邊斥埃新玉簫怨何處悽絕雨如塵

萬載賈

我舟泊蘭谿曉逢萬載賈賈兒富金錢昨來杭州府側
立意踉蹌隻身無伴侶問其何以然對我淚如雨苔云
甯波陷遠行畏烽炬奸宄無定蹤乘機劫行旅廉使屯
曹娥江名方伯籌營伍沈沈中丞公夙夜心悲楚又聞元
戎來秉鉞整鑿鼓捉船更備夫長江少鳴櫓杭州千萬
家哭聲震天宇安危未忍卜欲逃軍令阻黑夜潛來奔
附舟富春渚坐棄萬金產萬金安足數男兒在他鄉焉

能飼豺虎君今適何方莫渡錢塘滸舟子聽客言驚譁
到妻女怨我胡爲來相視色如土人生在家好出門多
辛苦嗟嗟行路難浩歎日已午

途中有避難自鎮海來者不得姚楝伯消息

遠與故人別悽涼望四明如何宵夢斷欲往客魂驚世
少孫賓石途窮阮步兵千山聞鶴唳解纜重傷情

招賢驛

寥落招賢驛峯迴夕照昏魚鹽荒聚市橘柚小成村邑
近殘兵戍天寒野雀喧孤舟未敢泊生事向誰論

留題常山旅舍

驚定翻成夢茫茫遣暮辰
鷄鳴尋渡去山色送人頻
兵氣羈商旅夷情雜僞眞
識途非老馬往返迹空陳

草坪驛題壁

時設兵防守

蕭瑟草坪驛歸途未及旬
陰崖低落日鼓笳恐行人
市井訛言易旌旗滿目新
棲皇當道路但有淚沾巾

重宿玉山旅舍

吹角傳書急中宵夢未安
雨風兼眾籟城郭逼新寒
歸櫂仍紅葉生涯愧釣竿
平生讀書意無奈請纓難

過十里山

十七日自玉山坐舊舟將返南昌

十里山前路遡歸，尙九秋樹圍孤塔。小疏長晚畦稠去，
權浮新漲流光感舊遊。寄書無尺鯉，何以達征愁。

廣信城外對月

江程風利去波柔，攀汰揚舡下信州。半夜漁燈明野渚，
數聲哀角動城樓。簾櫳倦望銀河曙，驛路寒生暮雁秋。
短檣關河自來往，劇憐涼月伴孤舟。

河口舟夜聞笛

遙嶺橫殘月，笛聲江上頭。人家映半竹，霜霧浩孤舟。此

夜天涯客聞風幾處愁那堪萬楊柳搖落不禁秋

晚過弋陽縣

忽忽三秋盡悠悠獨客行出門有岐路撫鬢歎勞生夜
夢隨鷗覺晨帆共雁征扁舟弋陽郭來去愴予情

貴谿縣

戰陣無消息流亡繞市塵客心殘月夜孤枕貴谿濱雲
路愁來雁江流困逝鱗乾坤空浩蕩慙負舊儒巾

將至南昌雨夜泊鳳皇灘懷伯兄作

商飈無靜響倦客多悲心北轅未展駕歸棹仍江潯白

露變清霜茂柯失繁陰蕭蕭鴻雁鳴渺渺流波深撫衷
鬱激感觸物成謳吟凋容不再妍嘉會孰能任迅濤眇
廣岸皎日忽已沈相見在須臾重闔蔽幽霖登艫悵霄
霓裊哀淚霑襟

遠遊

遠遊歸未得復此送殘秋霖雨憂深夜江風斷去舟迎
寒霜後樹閱世浪邊鷗一誦安仁賦能毋攬鬢愁

張亨父來自甯波讀近詩有贈

張君蓋代才曾次羅典籍貫穿兵家情每欲躬矛戟從

軍未入幕夷患已內迫大帥去飄搖血尸痛狼藉獨棹
三衢閒倉皇作竄客乞食幾無門避兵走荒驛莽莽茲
乾坤吾道逝安適報國天何階浩歎心空赤所哀斯民
艱一身詎足惜吁嗟兩年來粵閩困兵革狡寇憑波濤
去來無蹤跡長驅甯波城浙東掣偏腋連營望江海苦
畫備邊策但恐東南區慘澹若沙磧讀君篋中詩憂憤
鬱朝夕寶劍重摩挲摩挲復何益彼蒼豈不仁虧盈自
今昔濱海稱富饒珍異集番舶民性貪奇淫物力不知
惜百年釀海氛流離失廬宅君豈終賤貧束手悵無策

病鶴羈樊籠善保青冥翮

張亨父和余九日奉懷詩疊韻答之

國門鎖鑰曾推寇江渚軍聲夙憶陶今日書生紛涕淚
共誰天塹問英豪樓榭身世飄蓬感袞袞旌旗走傳勞
惆悵江城催急景朔風蕭槭凍雲高

原作

建甯張際亮亨父

許身愚豈能方杜乞食飢真欲類陶歲晚江鄉逢故
舊天涯烽火話英豪

國恩中外應知感民力東南亦已勞惆悵相思懷玉

暮飄零正怨海氛高

重九日余從甯波避兵至金華

次韵張亨父遊百花洲

東湖一曲接城南倒影天光作蔚藍蘇圃冥濛風外柳

洪厓披拂雨中嵐且將琴趣尋殘衲

有老僧善琴

祇覺歸心

動去驂惆悵虎谿盟未踐匡廬勝處聽君譚

亨父曾游廬山

原作

城闕微波似濟南水光蕭瑟漾精藍孤鴉著樹留寒

影細雨浮空散遠嵐榻廢尙憐徐穉宅池荒誰駐灌

嬰驂鑑湖回首淒笳鼓往日烏篷未忍譚

時聞紹興防警甚亟

烏廷
送名

送張亨父歸里二首

呼舊他鄉少，孤吟歲序催。
可憐烽火裏，猶見故人回。
身世餘書卷，行藏共酒杯。
桃林百萬卒，祇益杜陵哀。
江上正風雪，看君揚短舲。
還家豈高尚，無地問飄零。
嘯詠更何日，勳名待勒銘。
斯文覩氣象，應識少微星。

張亨父以長歌留別賦答

我交張郎今十年，膠漆不如肝鬲堅。
輪蹄聚散未足道，但覺魂夢時周旋。
懷玉山前重九日，扁舟獨去情蕭瑟。

憶君歲晚猶麻衣遙逐鴻雁南飛疾消息沈湮暮復朝
南浦那堪交臂失嘆君曾著盈尺書山中高卧何時出
天台雁蕩海氣通龍湫照耀金銀宮可憐孤客仍飄蓬
捫參歷井臨悲風悲風浩浩騰甬水鯨鯢浪驕天爲紫
竄身避地無甯奔揮毫但有淚千紙海邦赤子傷化離
天子日憂西南夷求賢昨聞

聖明詔書生報國無階梯犬羊梗化性反覆欲弭邊患
非鞫縻腰中鹿盧欲何用門前梗塞嗟路歧章江明日
又分手夜夜天南望星斗埋憂無地能傷人且盡生前

一杯酒

原作

建甯

張際亮

亭父

天寒臘近吾安適輿疾飢驅況憂國意外何期快盍
簪尊前且與論鳴鏑自從京朔判離亭似趁炎荒觀
戰壁厦門棄地豈孤懸甌海望風竟三北君時歸舟
日重九聞警書空恨千百念我飄蓬足自悲安知失
路遭兵迫漫言少小原好武轉向烽塵頻乞食故鄉
可憫難借箸良友堪依恐投壁遂令此際西山雲猶
愴當時四明色造物于人豈有心書生報主疑無日

句貸徒慙類子公貧病屢遣歸王吉固應謀身少長
策未免觀世餘太息專征已命漢金吾獻捷儻俘唐
鐵勒霜花慘慘劍下士簫鼓喧喧帳中客江淮河漢
欲橫流吳楚宋衛幾安宅敝裘風雪返柴門蒿目雁
鴻徧梁澤君憐我困久惆悵我去君留定悽惻見面
聊當約後期回頭總覺傷陳迹川長道阻書莫寄歲
晏年荒夢相憶讀騷莫歎屈靈均憔悴行吟有今昔
聞夷匪竄入慈谿復還甯波

邊烽猶未息叢爾此孤城未使驕夷懼徒勞武庫兵

聖明方有詔義士願同聲爲語防邊將毋忘挾纊情

寄孔宥函

故人淮上別相見待秋歸豈意飄蓬轉真如退鷁飛關
山多戰壘江漢失漁磯行止嗟難卜勞生萬事非

張亨父別後有懷

自失山陽叟斯文復有誰與君今日別使我夢魂悲上
舍陳同甫羌村杜拾遺南飛憐倦羽三市宿何枝

立春前一日憶張亨父有作

江城冬已盡景物劇悽涼有客隔風雪何時返草堂長

天聞去鳥無月對空梁又痛萑苻聚銷魂是故鄉

時聞吾楚

崇陽匪徒滋事

夢潘四農師

扁舟涉長淮掩淚過君鄉君墓吾未知杯酒不得將
歿者方千春存者煎中腸遺文尙在篋後死甯相忘蒼昊
胡不仁使君以詩昌入夢知路近江水可以航我往將
奚爲關河愁雪霜霜風吹瑤琴惻惻不成章

除夕前二日送伯兄督兵赴義甯州

時崇陽通山匪徒滋事義

甯接壤地也

江城歲已晏送子握軍令王事不可留馳驅未足病叢
爾甯州城楚山交相映但恐風化衰乘鸞巢梟獍脅從
誠可哀民愚亦本性海氛况未銷宵旰勞我

聖此行自努力執訊往有慶讀書誓許身夷險非所競
北風起川原蕭蕭旆旌盛上酬

天子恩下保萬民命

壬寅元夜對月

元宵燈火動江城幾處愁深望遠情無那中庭一輪月
照人空向異鄉明

送伯兄提刑雲南入覲

少壯功名遂中朝有幾人
萬山通楚道一棹去江濱
特達逢

明主歡愉慰老親
清時需保障努力靜風塵

移居 三月八日

豫章匪我里何事恒淹留
東風吹客心不與征雁遊
攜書辭官廨卜宅城西陬
念當伯氏別車輪腸萬周
羨子省親去我歸言及秋
閉門罕應接有廬可以幽
抗懷在古昔酌酒銷羈愁
禾黍知漸長庭木鳴春鳩
遇物每多

欣外此非所求

得祝子偉書卻寄

故人能憶我尺素勸加餐
笠澤虛歸棹金尊憶昨歡
天涯春已盡久客夢難安
烽火無消息中宵把劍看

題遂園耆年禊飲圖

并序

康熙三十三年甲戌上巳玉峯徐健菴尙書乾學果亭
中允秉義盛誠齋侍御符升續修禊事于遂園蓋尙書
別業也圖爲禹鴻臚尙基作卷首有錢湘靈先生陸燦
書蘭亭續響四字後有湘靈所作記一篇據記是會行

序齒禮湘靈居首年八十三尙書年六十四中允年六十二侍御年八十他如檢討尤公悔菴名侗年七十七編修黃公庭表名與堅年七十五尙書王公卻非名日藻年七十二僉事何公涵齋名棟年七十孝廉孫公赤厓名暘年六十九廉使許公鶴沙名纘曾年六十八洗馬周公礪巖名金然年六十四諭德秦公對巖名松齡年五十六凡十有二人通得年八百四十二歲凡分四曹其一曹在堂外之池邊皆坐面向編修黃公寫生者禹鴻臚也又一曹曲折穿桃花光徑中行次梧桐崗下

皆坐奕而在旁監局知狀此詩僧紺池涓公也又一曹
橋于園池之上皆立尙書公立其中央右手扶公此爲
長公藝初侍御及膝前六歲兒也攬公帶如欲驅此侍
御之長孫公之元孫也稍數武左立樹下三人一爲公
之猶子孝廉實均二爲伯厚仲質皆侍御子也又一曹
池邈踰長廊樹石間移山之陰而漸近于陽有堂翼然
浮圖矗其前而已在玉峯之山頂矣記又言以蘭亭二
字爲韻各賦二詩而此卷諸公題詠不載又董含聞石
據尊鄉贅筆遂園之集折簡而招者共十五人赴者十

二人其三人期而未至闔石其一也尙書於是歲擬再
爲登高之會而首秋已歌薤露之什矣此卷今仍爲尙

書後裔孟卿

志導

少峯

志恭

所藏

江左風流地尙書亭館新玉峯最高處禊飲送餘春雅
會今誰繼山陰迹共陳章門風雨夕展卷感前因

懷戴雲帆

芳草綠未已城南往事陳相思詩句在遠道鬢華新江
海連兵氣燕吳共暮春北來更何日尊酒話風塵

書旅舍壁

僦屋依塵市風塵合閉門閒居惟養拙得句共誰論書
愛鄰兒讀庭客野雀喧生涯甘寂寞吾道自能尊

聞孔宥函改官東河同知賦寄

帝京共久居送君歲爲常風吹去馬北我乃天一方義
輪去不停浮雲生傍徨古來英豪士竹帛希景光朱顏
奪老醜撫衷行自傷春色臨江湄燕郊草初長韋郎竹
返淮甸湯子海歸湖湘尊酒不我與疾疢櫻中腸利劍
思出匣駿馬騰康莊汶濟非故流世事休慨慷

題徐孟卿少峯詩卷

孟卿時
往楚中

兩載章門路論詩少故人羨君好兄弟得句必清新
雨懷征路飛花送莫春萍蓬更何地杯酒合相親

立夏前一日徐少峯招飲壺園

名園得新晴陰靄時復積停觴俯橫流開軒納翠林
光養餘清鳥飛各有適拳石自太初萬籟養虛寂覽茲
物化遷坐感遠春迹短鷗送我還暝色半城夕

憶伯兄

江城話別屢經旬北上京華夏已新遙望庭闈四千里
老親定問未歸人

夜坐無月書感

客居聊可息塵機，抱膝高歌自掩扉。
七尺未甘章句困，二毛漸覺壯心非。
春殘江國流鶯語，煥到燕山旅雁稀。
風雨經旬孤館夜，更無明月照琴徽。

雨霽獨飲和陶連雨獨飲

宿雨忽新霽，羣動皆欣然。
好風被秔稻，鳴鳩時一聞。
莊老詎能達，松喬未云仙。
有生處逆旅，飲者全其天。
何地非康衢，甯慕羲皇先。
登高眺雲氣，晨出暮復還。
得喪理自齊，陶陶以終年。
得酒真百感，庶與知者言。

弔婁妃墓二首

一唱筵篔曲狂夫竟不還孤墳千古在寂寞對青山

兩字垂屏翰何殊諫獵書傷心一片石夜夜有啼鳥

江今

西藩司署爲甯藩舊址中有屏翰二字傳聞婁妃所書

望晴

南土瀕卑涇江天何日晴開軒侵霧氣欹枕厭鳩鳴向
午庭常暝餘寒服未更災黎當有託莫誤及時耕

徐孟卿少峯出示其尊人廉峯丈憶壺園圖感賦

圖爲蕪湖黃左田尙書辛卯祝釐入都時所作尙書致仕凡十有六年去秋卒千里第

西山雲氣來匡廬蒼翠襟帶江與湖有園可攬豫章勝
結構不異壺公壺園中主人今安往喬木蒼蒼碧草長
承明方倚著作才讀書論世懷忠讜一亭一石歷歲年
致身蓬島殷遐想有耳不聽鵠鳴有手可搏蛟與鯨
欲登高邱望遠海長劍陸離天外橫憶昨燕臺花滿甸
城南吟社歡遊讌賤子曾叨末座陪嘉賓盛集東南彥
蕭蕭短髮凌天風冰山嵯峨烽火紅諸將貔虎氣若虹
花門獻馘醜類空

天子詔開明光宮儒生奏凱歌崆峒堂堂大筆摹韓柳

平淮雅曲難爲工卽今海邦傳羽檄露布何當靜鋒鏑
平泉池館未彫零江國鶯花莽蕭瑟主人有子復有孫
崑山舊德眾所尊風流文采映千古遂圍觴詠餘清芬
貽謀經訓足式穀豈獨閤閱盈簪紳西州揮淚感知已
山邱華屋難具論噫吁嘻山邱華屋難具論尙書幾日
辭東門宮亭東望鳩茲道逝水滔滔日夜奔

雨夜次韻答徐孟卿少峯

望舒已離畢同雲無留影門掩蒼苔深犬吠窮巷靜夜
氣何冥濛客心積憂耿去鳥思舊巢浮萍戀故梗咫尺

殷桐知喪哀惜修景援琴一再鼓離緒渺然永秋風戒
徒旅露下關河冷勞生逐舟車何由俗塵屏

月夜聞鄰人吹笛

今夕天涯月高樓無盡情不知何處笛偏作異鄉聲傾
耳餘幽渺停空忽憤盈難忘征路感莫遣到邊營

雨後過壺園

屋外青山色相看似翠微登高雨初霽舉酒客將歸林
密忘花落泥輕亞燕飛他鄉憐候景祇益鬢毛非

園中可望

西山京畿之西

山名曰翠微

民事

民事憂方亟江天雨易成風濤春後壯家室水邊明黯黯垂雲盡冥冥去鳥平不知諸父老何日隴頭耕

聞鄭元甫翁

復光

將至南昌

翁歛人

不知風雨外何處故人舟獨鳥長天盡千邨積水浮盈尊餘濁酒相憶有高樓三十六峯裏它時許共游

雨霽泛舟東湖至百花洲晚望

百花洲宋講武亭舊址

晚流泛澄霽萬籟靜不囂舍舟得平陸開軒列層郊漠漠低落日蕭蕭生夕飈菱荷冒初葉楊柳敷青條湖光

養林谷山氣改暮朝暫忘昏霾苦獨眺川原高鳴鏑昔
列陳張醮今僧寮勝蹟有遷變榮悴甯足嘲

晚渡北湖觀音亭小憩

鳴鳥天已曙羣動含清輝稍稍日華上濛濛山氣微扁
舟待客渡孤亭若無依霧露冒蘋藻湖澗盈漣漪嶺樹
開積靄林烟散輕霏靈境靡時絕心賞偶在茲素昧清
淨理願忘來去機物象孰朕兆伫立情已移

澹臺墓

烟水東湖路澹臺墓未湮十年說劍者空憶斬蛟人

送汪大竹文

全泰

之揚州

雨歇西山曉翠浮
送君更上木蘭舟
離心渾似章江水
東去金焦天盡頭

聞張亨父近況感賦

還家迫臘盡生計益云艱
多病詩從廢長貧念未閒
閉門無斗粟蒿目憫河關
但有陰符在開編向故山

生日寄內

傾此盈樽酒勞生感獨長
君能兼子職我尙滯他鄉
競渡良辰近人家角黍忙
百年間蹤跡詹尹恐難詳

題姚梅伯舊贈畫扇

扇畫秋海棠

前年適雁門別君燕山麓我歸君已行良會一何促當
時所貽扇今猶常在握飢驅君出門生計歸益蹙蕭條
烽火間何處訪茅屋存者紛流離歿者盈溝瀆有親將
何之消息不我告可憐海棠花裊裊秋意足收扇置篋
中短歌不能續

讀書

歸帆阻江城青山久在目倦客稀歡娛開編理幽獨莫
莫林陰繁冉冉春景速徒竭方寸心莫覩往賢躅疑義

誰與諮嘯詠從所欲食息昧昏且譏朝謝僮僕有田儻
可耕閉門就深谷

遊龍岡有作

并序

亦名龍沙在得勝門西沙高去城堞僅三尺許飛入城
者半水經注潁水北經龍沙西連亘五里卽此地也舊
爲九日登高之所唐中宗幸臨江亭杜審言宴江陰詩
曾及之孟浩然權德輿皆有九日龍沙之作蓋古時已
爲勝地至唐代士大夫宴遊登眺遂傳爲故事矣明太
祖破陳友諒嘗築臺朝父老於此太平寰宇記謂沙上

時見龍跡信然岡在郡北土人因呼曰北沙

白龍始何年盤沙鬱江介長風驅入城蜿蜒相襟帶地

脈根精靈亘古長不壞鱗甲宵無聲星月助光怪登高

望洪都但憂湖津隘

南昌郡有湖九津

抗手招洪厓浮雲薄如

蓋章江天際來一線恣澎湃浩浩紅日中萬井滄澄靄

不逢昔遊人埤垵指興廢

得張亨父書並斷炊詩卻寄

破屋從人借荒廚味自諳饑寒汝交迫寤寐我茲慙分

作溝中斷誰憐繭後蠶尺書何以報欲往悵江潭

遊百花洲偶作二首

弱柳參差綠未勻，長堤十里趁遊人。
偶來湖上題詩句，待取成陰更幾春。

隔岸山光似玉函

濟南山名

明湖佳處夢中諳，清遊更憶南

豐叟風月多情愛濟南

宋曾子固官濟南時愛其山水賦詠甚多遷知襄州尤不能忘

離齊州後詩云從此七橋風與月，夢魂長在木蘭舟。又誰對七橋今夜月，有情千里莫相忘。詳見居易錄七橋

在明湖上

雨後待月

暮霞江上晴，薄雲簷端宿。
抱疴有餘閒，倦懷若深谷。
夜

露馥叢蘭風軒暗華燭明月不可期清光滿林木

與張亨父過壺園晚登小臺

亨父翼日將行

際晨悽無端出門寡素謁端居厭塵喧登臺興超忽長
江浩無窮連峯對鬱勃蒼蒼去雲遙冥冥孤鳥沒積陰
晦城阿遠颺動林樾執手感易盈傷離情多闕明發君
已遙撻裳不可越

送張亨父之山左

憐君蹤跡如孤雁終歲飄搖靡定棲病後高歌能激蕩
天涯此日復分攜江南何處求梁稻海上無端厭鼓鼙

匹馬岱宗莫回首浮雲萬里自淒迷

題鐵柱觀

傑構垂唐代馨香祀屢修虛堂靜神鬼一柱奠江流民
物心兼濟精靈迹偶留登高望滄海蛟鱷正堪愁

題畫

茅屋三兩間參差彌邊路獨坐窮日夕展卷理豪素天
秋羣籟高雲淨數峯暮幽鳥自返巢暝烟逗遠樹柴門
望非遙扁舟喚可渡策杖誰復來怒焉寄遐慕

題無名氏畫

隔嶺聞曙鐘知有殘僧寮盤紆涉汀曲迢遞凌山椒晨
光闢泱泱曠然見平皋朝日蕩羣翳林壑風蕭蕭結茅
此中住偃息足暮朝有名適爲累無用誰能雕旣忘烽
烟苦亦無井賦勞畫師汝何人縱情遊逍遙

晚泛東湖歸途遇雨

夕日明高城打槳東湖渚蓮葉紛如雲中流憎容與晴
光搖遠林微風掃繁暑攬衣尋渡還烟雨蔽平楚

次日冒雨再過百花洲晴遊湖上諸寺

清遊不厭屢言適三洲東況茲雨風際浴緣殊未窮飛

鳥戀過客蒼山低舊容漾舟出迴渚登岸聞鳴鐘湖光
做精藍霽色明高塘香界泯眾有靈異孰可逢亭荒弔
徐子園廢尋蘇翁夙抱泉壑癖甯慕高人蹤

北蘭寺懷故巡撫宋公犛

公會建秋屏闕于
寺中以眺西山

宋公憑眺處屋外遠山青爲政多賓客風流付杳冥龍
沙殘日冷蛟浦落潮腥鐘磬何年悶淒涼我獨經

晨望

遠巒動曙色萬井餘輕烟露華炫深林日曜相增鮮老
農負耒耜各各趨東阡清風汎禾稼一碧流遠天但願

霖雨少刈穫登豐年布穀鳴不已幽客猶高眠

聞張亨父復過南昌追之不及

聞自吳城返仍爲山左行窮途惟涕淚短棹自孤征蒼
莽風濤外艱難去住情片帆何太急離思悵盈盈

珍珠鳥

于南昌市中見
之蓋粵產也

樊籠有小鳥產自珠江湄雖無俎中烹已陷虞人機飲
啄不自適鳴聲若無依振羽旋疾雪萬點輕烟霏願乞
主人恩放汝雲中飛

夏日書懷

敦風好齋詩初編

卷六

天

有生役大化在冉逾壯年往者不可再無聞矧多愆晨
興南榮下黽勉手一編前修恨莫逮抱此終瞿然寥寥
庭宇際炎炎高日懸坐久既忘暑靜中澹諸緣馳暉忽
已暝倚檻聞幽蟬

東湖

東湖一老翁垂釣春復夏得魚易酒還妻孥話深夜卧
看天外雲悠然在林鱗

重過北蘭寺

六月僧廬晝掩扉殘鐘無語客來稀江聲遶郭蛟龍靜

樹色低檐蝙蝠飛名輩已隨斜照盡倦遊祇覺二毛非
扁舟又作南征客惆悵西山隱翠微

予將有黔中之行

敦夙好齋詩初編卷六終

男恩頤校字

敦夙好齋詩初編卷七

壬寅七月
至九月

漢陽葉名澧翰源著

湖澣集

七月初三夜泊市汊

是日
立秋

扁舟泝章江向夕未停榜
首途天已秋涼颿滿林莽
岸迴孤火明露下寒流廣
行役亦已疲浩歌復何往

豐城縣

際曉發市汊午過豐城縣
邑小人煙稀地靜鳧鷗徧
連峯宛覆盜清流亘長練
山川閱人事俛仰淚成霰
當年

敦夙好齋詩初編

卷七

識氣者有目，明若電。雙龍逝，何鄉時來汝。終見

金花潭

宋陸祐孟太
后祀風處

烽火南來入吉州，雙蟬零落倩誰收。孤臣有淚垂松漠，
侍女無魂傍玉鉤。青蓋倉皇千古恨，瑤華蕭瑟故宮秋。
匡山莫問慈元廟，橫海魚龍怒未休。

苦竹洲

渺渺關河氣已秋，雁飛幾日過南州。風流不見漁洋叟，

夕照蒼涼苦竹洲。

王漁洋有苦
竹洲聞雁詩

樟樹鎮

明王文成
公誓師處

往日陽明子英姿敵萬夫義旗下章貢大勇出真儒雄
鎮存枯木荒祠叫夜鳥聖言期致用未覺象山孤

臨江河口

解纜乘清曉千山引去舟天寒微有雨江靜不驚鷗夾
岸風鳴葉孤蓬暑變秋投衣節未屆空覩舊貂裘

臨江府懷施公閩章

施公守湖西餘事惟講學清江白鷺間往返歲云數豫
章多名材一時中斤斲東南兵火餘持節坐征權瘠土
稀人耕未忍事剝宅心六義中訂謨何其卓靄靄闡

阜雲流風歎縣邈載吟賣船篇執鞭慕先覺

七夕雨泊新喻縣寄內

向夕聞風雨瀟瀟送遠征孤舟天末夢萬感暮灘聲
牛女經年別波濤獨夜情相思同有淚際曉一燈明

分宜縣

清絕分宜縣涼風霽景饒人家綠畫堞帆影落危橋
灘響中流合秋光萬象遙誰家橫玉笛蕭瑟木蘭橈

晚泊甘泉灣

隔峯見孤村衝流下飛瀨夕陽散餘輝扁舟入蒼靄鐘

鳴荒寺遙犬吠亂煙外
夜火明漁家涼風葭莢會

鐘山洪

舟行入鐘山似經七里瀨
榜人習利涉飛流遄擊汰
連峯俯絕壑盤旋自縈帶
波濤息無時雲物翳層靄
山椒幾人家逍遙蔭松檜
數蟬何處鳴蕭蕭動風籟
眷懷林居者日與物象會
何必桃花源放情謝塵壒

袁江阻風野泊

向夕袁江路秋光入望迷
灘流隨碓轉山翠翼雲齊
獨櫂西風暮平皋細雨低
蕭騷征客興片艇且安棲

袁州府客舍題壁

沂盡袁江險孤舟滯客魂
鷄聲聞驛館雉堞抱山村
雨急灘聲壯風高月色昏
昌黎司牧地遺蹟共誰論

萍實橋

相傳楚昭王
得萍實處

放櫂荒城下沿緣晚景幽
日斜看鳥度雨止聽谿流
樹色分吳楚風痕散鷺鷗
昭王遺蹟在萍實更奚求

夜泊善洲橋

西風瑟瑟催殘暑波平如鏡
儻容與扁舟日暮不逢人
兩岸蒼蒼搖禾黍羅霄山頭
片月明善洲橋下秋水生

挂帆更泝湘東驛暮雨連江猿夜聲

灘行感興

五日萍鄉道羈懷未可刪沿灘忘路險蓄水念民艱獨酌秋光晚登艫物態閒勞勞頻道路慙負舊柴關

湘東驛

日夕湘東櫂征帆殊未休江風吹地轉嶽雨極天浮萬族迎涼序孤蹤誤壯游荒村少醺醪古調憶三洲

晉三洲歌

云湘東醺醪酒

舟晚

萍川流水入湘東
日日看山暮雨中
傍晚扁舟何處泊
一天秋色滿青楓

醴陵縣

斜陽照荒邑
萬谷來悲風
他鄉勞政涉行邁
何時終飢禽
叫廢埃寒霧
迷孤蓬
慘澹眾峯色
天外青濛濛
右鄰潭州險
左顧彭蠡雄
聶爾茲彈丸
實爲南楚衝
檣棹驚物候
丹翠明霜楓
徒歌送歲月
羈眺心多忡

下醴陵諸灘

灘行奔醴陵
前山日欲落
亂石森中流
湍濤怒噴薄
光

清瀉澄鮮渦盤極垠塢失勢一墜跌性命隕如蘗肯忘
垂堂戒微軀飽蛟鱔篙師力鼓汰歡呼興自若冥冥山
外村天風噪鴉雀

出淶口

飄渺楚峯青乘風揚短舸漁歌聞幾曲夕色蔽前汀雲
氣開衡嶽江聲走洞庭憑舷發幽思鼓瑟問湘靈

舟中對月

明月照征蓬寥寥萬象空秋涼微有霧江遠靜多風宿
鷺依迴渚歸鴉集晚楓天涯當此夕旅思幾人同

湘潭縣

芳草湘皋路乘流一溯洄游雲依片艇秋色送孤杯忽

憶陶園子飄然大雅才朱絃竟終古淪落不勝哀

邑人張度

西先生九鉞乾隆中官江西縣令有聲所爲詩爲我朝兩楚之冠有陶園集

入長沙境

扁舟日日逐西風倦客空嗟似轉蓬漢渚鄉心飛鳥外
楚天秋色亂流中道鄉臺冷寒雲暮賈傅居荒夕照空
惆悵江山易陳迹不堪搖落對青楓

長沙府城外夜泊大風

七月二十七日

江行多飄風久客少歡意言遵長沙郡積流疑無地日
落瞻孤城艤棹城外寺仰觀嶽麓峯餘嵐帶蒼翠洞庭
渺已秋風色際天異白雲時復流冉冉動羈思狂飆起
舵樓入夜更憂惴慨然天地間七尺茲焉寄角聲何處
聞孤鐙警客寐

喬口

鼓櫂入喬口灣環眾水通冥連迴岸屋寒亞遠林楓湖
氣沅江外人聲暮雨中那堪洲渚望嘹唳徧哀鴻

益陽道中懷湯海秋

挂席濱江路秋風日暮生故人方遠宦憐我尙孤征雲
物高陽里風塵曼倩情山川殊不惡何日卜歸耕

渡天心湖歌

麻陽艇子輕于葉乘流不讓矢飛捷今朝忽到天心湖
長風吹渡浪千疊波濤浩浩浮青冥白日出沒中流明
奔雷歛雪不可止恍如鼓櫂凌滄瀛須臾到眼橫洲渚
令人回首心魄驚雲煙慘慘楓林青白鷗飄渺如我迎
舟人伐鼓醜神酒落帆已達龍陽首書生那厭行路難
醉後高歌拍銅斗

龍陽縣

楚水日夜漲西風猶未休波濤迷井里風雨撼城樓殘
夜鯨鯢鬪荒林薜荔秋飄零沙渚雁不斷向南遊

舟中書感

我徂沅江櫂百里驚濤奔居人適何所千室餘空村今
歲炎雨多禾稼苦不蕃洞庭挾五谿地軸日夜翻蕭條
墟里中幾見炊煙存絕流競網罟薄暮漁舟喧殺機萌
口腹慘毒傷天仁沽魚不忍食恐爲亡者魂長風飽帆
勢感歎愁黃昏

敦夙好齋詩初編

卷七

七

暮泊常德府城下懷楊性農

葬

未涉千灘險停舟朗水涯秋光滿山翠何處故人家
枉渚多冥雨風門名山帶落霞天涯歲云晏愁聽暮城鴉

招屈亭

逐臣千古怨懷沙猶有孤亭沅水涯短笛數聲蘆葦外
秋風何處問漁家

常德府

沅渚蒼茫入望疑江城八月客帆遲青楓瑟瑟經秋老
白雁聲聲向夜悲百代高名懷善卷九谿風雨下羅施

由來形勢誇黔楚鼓角徒興弔古思

曉發常德

去榜鷄鳴發蒼蒼曉色昏西風飛片席寒霧失前村
潦涸秋花靜沙清宿鷺喧儻逢垂釣者一問武陵源

河湫山

俗訛爲何福山

羣山俯朗州蒼翠走絡繹微颺散層陰落日帶荒驛
舟移風潮轉巖遠松杉積灘流激潺湲梵宇映丹碧乾坤
自逆旅仙靈侈陳迹我生信有涯大化任所適浩歌放
扁舟山鳥啼向夕

雨中過桃源縣

邑小稀村市江聲盡日聞孤帆低密雨隔嶺蔽寒雲米
賤山田熟波明水鳥欣沅南城不見想像伏波軍

綠蘿江

沅水悠悠接綠蘿西風日暮奈愁何洞天寂寞無人問

獨倚篷窗聽櫂歌

綠蘿山道書以爲
第四十二福地

桃源洞行

停舟桃花源洞閉已千載桃花落盡鷄犬稀翠壑丹巖
長不改天風蒼蒼薜蘿深飛泉淅瀝如幽琴漁舟歛乃

不知數沅水東流自古今

晚泊桃源洞對岸

寥寥村市外過客未迷津
柳色依行舫鷄聲接比鄰
樹深時見犢谿靜足垂綸
咫尺桃源路常爲太古民

穿石

相傳爲伏
波避暑地

清秋肅萬象石壁森崔巍
其傍諸山阜拱立如嬰孩
孤撐絕依倚遠勢交縈迴
遶遶大古雲漠漠千尋苔
半空竅厥腹石骨爲之摧
不知造化始斧柯何由開
江流踳以曲噴薄旋風雷
伏波昔南征茲焉避塵埃
英雄不可

作俯仰生徘徊

姊妹山

二女此棲真不知何年代山空晝無人天風響環佩

夷望溪

一名漁網溪

孤峯表危柱溪水湘迴澗羣巒峙左右蒼翠如列屏岩
巖幾千載草樹騰繁英孤根入江底泮泮羣流清徑絕
若無路忽見煙火明此中卜居者朝夕何所營日與漁
樵游甯有軒冕情清風動萬木喈喈羣鳥鳴曠望心自
適何必秦人迎

雨後舟中作

風帆不遑息萬險自朝昏浦樹含煙重灘流帶雨渾鬢
毛催歲月波浪役心魂得失差能悟思將古易論

高都驛

蠻方節候異八月未知秋殘霧灘邊戍悲風角外樓沿
谿漁唱合隔嶺柏林稠征櫂愁歸路江天歲易遒

雨中過大敷谿

沅流北來注南望苦攀躋巖雨連江暗蠻煙蓋樹低魚
樂鳴亂石鳥道接層梯征路忘昏曉村雞祇亂啼

界首塘

川路何時已行行入百蠻雲荒搖壁暗雨急泝灘艱
涉勞歸夢煙霜益苦顏天涯游已倦但羨老漁閒

懷張亨甫

竟日疑風雨灘聲挾客舟故人阻江表征路黯離憂
薄醉難成夢他鄉畏及秋不知天外雁嘹唳更何求

甕子洞

重灘連九谿涉險自茲始逢窗正高卧大聲忽驚耳
冥冥日光寒鬢鬢石狀詭雷霆轟八埏冰雪薄萬矢窄徑

關嶮巖扁舟鬪犀兕不知千載下
空洞何時止十夫牽一椀號呼無
停趾鑿徑攀半崖跬步異生死灘
前幾人家眾木自叢倚寒蟬時一
聞謾謾晚風起

途次得崑臣伯兄黔中書

中年易離別無乃夢魂勞人去黔
山遠風吹熨月高怪禽依客榜毒
雨下林皋欲寄高堂信開封首屢
搔

中秋日艤舟明月山下登最高頂
過明月庵日暮而歸

灘行不知艱風水互相逐孤峯屹
招提維舟傍曲洑窄

李處女詩言不卷一
徑盤紆橫橋俯巖麓宿霧暎半霄夕暉蔽叢木飢猿
啼滿林哀禽倦飲谷眞賞溢素襟清光接遠目嫋嫋微
波涼娟娟秋月獨佳人渺何方中夜軫思服

是夜泊麻伊湫

愛月緩停橈舟行不厭遙檣燈明夜霧戍火傍山椒風
定支篷穩灘回東水驕浪游成底事旅思一尊銷

雷洞灘

雷聲何填填填填來萬灘大風轉地底亂石何盤盤巨
古蓄風雨百靈翔濤瀾澎湃半空際慘澹陰氣寒舵師

習波浪簸揚人如九入坎復出坎始知宇宙寬灘盡泊
我舟殷耳猶未殫

青浪灘遇雨

上有伏波
將軍祠

曠曠山上雲翩翩谿中石迴風吹我來飄渺復安適上
有倉浪天高飛乏寸翻下有千仞淵蛟龍之所宅乾坤
失鴻濛崖壑肆洞闢萬竅中怒號一身苦跼蹐嗟予稟
垂堂及茲爲遠客霧雨瞻靈旗默禱籲英魄

雨泊印家橋下

瀟瀟江上雨未夕纜孤舟去鳥紛寒色流雲攬客愁橋

敲衰柳暮泉響萬崖秋不寐勞振觸年華付倦遊

雨夜寄內

征客輕波浪蕭寥百慮空長江連日雨孤權萬山中夜
氣沈寒瀑詩心感落楓遠游君莫笑筋力耐秋風

北斗灘

怪石凡七
隱若斗杓

靈憲炳蒼昊璣衡司中央雌雄貫左右坤絡呈其光恍
惚乘靈槎邀游漢津旁日月出其裏宙合爲低昂倉浪
萬古天一氣涵茫茫千巖爲喉舌萬壑爲酒漿紫霞我
爲佩翠雲我爲裳仙人儻可遇乘風共翱翔

夜泊北溶驛

北溶谿邊驛萬石相縈旋太古茲嶢嶢鳥道晴空懸藤
蘿覆絕壁秋氣高蒼然蕭條幾板屋時復明炊煙山空
百蟲響微風淒鳴泉危坐擁孤燭夜久音逾宣層陰翳
前瀨明發盡洄沿

橫石灘

太行詎云高呂梁未爲深一灘復一灘巨石敲古今危
舟不可上長年聲欲暗憑舷厲輕篙逆流爭尺尋我欲
持長鏡鏜此頑崖陰慨想伏波語九谿毒且淫極目遠

風外浩蕩孤飛禽

大風上九巖灘

風勢晚來厲吹人上九巖孤帆不可度舟子慘相依亂
壑蛟龍鬪荒天雨雪飛敢云仗忠信履險豈知幾

百叟灘

相傳後漢劉尙征蠻至此百夫叟之不能上

劉尙陳師日扁舟竟未還可憐南郡卒不入武谿蠻笳
鼓連荒服烽煙斷廢關

長谿縣境有劉尙城故址爲昔日屯兵之所

至今灘

上水餘恨響潺湲

暮投清平驛

際曉轉灘石一身試萬艱灘外見辰州江清晚無瀾
山映空翠蒼蒼斜照寒獨鳥赴寥廓哀狖鳴巘岸轉
水霧密村靜竹柏閑清風聞雞犬居人方掩關客感集
荒驛長夜何漫漫秋蟲響不止零露淒已團

辰州府

沅陵故阨塞巖徑多官郵置郡自何代屯守羣山陬朝
曦隱窅窳寒霧遙天浮岸敲楓杉茂谿清鷗鷺遊巖城
控南徼飛蕩連層邱闐闐古雄鎮鼓角風颼颼吁嗟盤
瓠種出沒谿峒幽往年鎮筸患茲地爲咽喉傅公鼎實

傑出談笑清戈矛防邊無異術未雨先綢繆英魂尙祠
字典型不可求書生輕途路慷慨橫吳鉤

沙谿驛

古驛沙谿側飛帆午漲新急湍崩亂石宿霧下荒榛擔
負多蠻女征徭損戍人栖栖江上客奔走豈謀身

瀘谿縣夜泊

客行瀘谿縣蒼蒼白日暮雞犬不聞聲繫纜岸旁樹邑
小疑無人地寒惟多霧暝色際斷峯烏啼滿荒戍悄然
夢未安空闊如有悟晨光漾前灘驚流更洄泝

仙人屋歌

在馬嘴巖屋嵌絕壁厯厯
在望屋中有木積寶劔云

仙人乘鸞遊太清交疏綺棟空崢嶸白波漣泮山冥冥
恍如丹房紫洞凌蓬瀛屋中何有積盈尺得毋瓊編與
玉冊芙蓉千古不生花魄黯光沈湛寒碧白雲片片隨
風吹松花寂寞生青苔瑤池青鳥不可見仙之人兮歸
去來

白龍巖

白龍在層霄倏忽不可覓飛來踏巨波化爲千仞壁當
風蟠虬繆鱗爪猶厯厯噓吸百蠻雲橫空聞霹靂

浦市夜泊

暮色已如此扁舟何所之風低牽纜重灘迴櫂舟遲樓閣連檣外汀洲落雁時寒江坐蕭瑟微火一篷敲

辰谿縣

江寒露霜下獨叩辰谿舷仲秋忽已盡萬象何蕭然中流蕩彩鷁簫鼓鳴遠天楚人尙巫祝眾嫜何嫵媚悲風颯靈旆照耀斜日妍高蕙倒屣屨欄檻相鉤連荒城正宿霽噴薄雲中泉奇骨表巖厂太古摩空懸草昧造靈秀雷雨爲之宣一線達蠻服跼跼愁飛鳶羈懷莽無際

哀角沈荒煙

木洲

灘路乍陰霽蕭騷景自幽
清泉通絕壑叢木識孤洲
耕稼當平世漁樵習釣游
雞鳴村舍靜萬綠不知秋

楓林崖

崖上何年寺雨餘
楓葉濃客心正愁絕
忽聽暮天鐘

自黃谿口至龍頭庵

龍頭庵壁刻山
水蒼泱四字

日落龍頭庵水喧黃谿口
谿口幾漁家疏煙糝衰柳
山水何蒼泱磨厓字如斗
不見庵中僧飛泉自鳴吼

渡惡灘

瘴雨蠻煙去權涼孤灘如馬起中央不須更話瞿唐險
兩岸猿聲已斷腸

黃獅滾洞灘

人言黃獅灘扁舟不可上青冥湧巨濤何如鬪犀象

風篷巖

山色送行人不憂風力猛長江爲巨舟青天挂帆影

安江驛

安江秋色霽驛路渺人煙諸葛荒營盡牂柯落日懸賈

兒爭晚市蠻女汲清泉誰識勞勞者憑舷歎逝川

洪江

灘行無窮已行役何其艱悠悠古雄谿水清魚鳥閒秋
高萬峯秀爽氣開百蠻願言躡芒屨登眺舒心顏扁舟
苦水宿何以娛眠餐舟人貰牲醴醉飽神所頒臨流歎
勞人鬢髮羞潺湲

大鷓鴣灘

灘在洪江上數里又有灘名
小鷓鴣者在洪江下亦險惡

小灘不容舸大灘何淼漫風搖萬點墨拍拍濤浪閒斜
睨猱毒目怒立森老拳張吻欲攫人充彼魴鯉餐洶洶

蹴踏聲震撼十里聞前年芷江宰失生茲游魂舟人不
敢語酌酒飛紙錢天胡產此物永爲行旅艱

舟夜聞角

寒霧連空客夢迷數星臨水戍樓低秋風何處吹哀角
一夜飛霜下五谿

噴水灘

鼓舵越層崖崩濤浩盈谷亂石礪齒牙厥鋒誰能劘吁
嗟蠻羌地疇昔屯瘴毒蛇虺穴其閒虎豹不敢觸一線
開鴻荒艱險比巴蜀我舟忽退飛失勢方躑躅一葉脫

危牽瞬息千丈速榜人盡色戰乘流施鐵鹿衣裯那足
嗟幸未飽魚腹倚篷曬做書驚定看朝旭

舟夜聞雨夢姚梅伯

欲覺聞殘雨傷心夜夢非波濤吾不死烽火汝誰依患
難憐歧路悲歌仗布衣風塵何日息相見有漁磯

雨霽泊黔陽縣城外登芙蓉樓送客亭而返

雨歇翠微深歸雲送餘滴短篷上晴曦欵乃寒城夕煙
淨前村明葉下空波積嵐光扶麗譙荒景出丹碧石泉
吐涓涓灘風響激激目因奇觀豁心與澄流滌禿楊倚

嶢嶢虛亭得岑寂不見送客人解纜去孤驛

高粱洞

亂山落飛湍直下莫能束茲灘轉迂威拗怒震林谷洞
門立嶮衍萬古自停蓄盤空雷殷耳穿罅雪盈目船尾
如曳龜船頭似飲犢篙槳難爲施左右相迫蹙邪許集
榜人環環牽在腹出險爭須與快若逃桎梏伐鼓酬江
神荒祠倚崖木

榆樹灣

征途忽清曠客權入沅州灘勢緣山折猿啼向夕幽婆

娑餘古樹浩蕩對閒鷗霧雨江天暗停橈起暮愁

羅舊驛舟夜

夜深羣籟息何處鳥鵲蠻沉值秋風候能彫旅客顏
荒兵播穀烽靜月銜山杯酒陶鞮思休言道路艱

沅州府

打鼓沅州驛江程秋氣多城高盤磴起橋卧偃檣過水
國憂風雨晨光泛薜蘿黔山從此近隔岸雜蠻歌

打卦灘

我聞蒼梧野有山名六爻茲灘何爲者畫如兩儀交元

黃旣剖判陰陽不能淆因思無極初萬象方渾包朕兆
伊何人造物毋乃勞末流競神鬼繁言一何謏吾生信
前定窮達隨所遭

暮至便水驛

村市多寥落谿流古驛亭雨蒸山葉暗瘴下藥苗腥宿
鳥依寒石閒雲媚遠汀流泉響何處琴筑奏泠泠

滿天星謠

亦讌名

何年天上星墮地化爲石纍纍復纍纍
寒裳愁日夕牽牛與織女脈脈不可招
安得千鳥鵲填河作長橋

南斗工鼓瑟北斗爲我歌
河畔多悲風欲渡奈公何

自晃州驛至龍谿口

倚櫂問黔程秋風感陳迹
市聲喧谿頭已過晃州驛
山光低短篷日色蕩高壁
裊裊芙蓉花影落蠻天碧

藤蘿灘

天逼中流窄扁舟未可升
繁霜彫卧柳疊嶂倒垂藤
搖落秋容老馳驅歲月增
世途嗟梗翬華髮莽相仍

萬卷書巖

箋注紛拏豈足稱誰知萬卷在峻嶒
飆輪我欲尋天闕

盜簡今難問羽陵洞室何年宣祕鑰縹緗終古護蒼藤
書生不具封侯骨南面猶誇坐擁能

九日雨泊玉屏縣城外寄懷崑臣伯兄

弟兄離緒苦忍淚寫家書九日清尊在孤舟客感餘南
天鴻雁斷中澤鯉魚疏回憶兒時趣青鐙尙做廬

響水洞

亂山入黔郡秋色淩孤清亭午息羣翳白日中天明地
冷霜葉麗風靜微波生石氣浩飛瀑因知朝雨晴巖城
百雉列樓閣千壘呈薜蘿拂欄楯雲霞流簷楹不知邃

古初茲焉誰所營
智慧失瀉悶雕鑿
誇崢嶸徒令百世
後過客愕且驚
神仙在人境何者
爲蓬瀛

清谿縣

盡日清谿道飄蕭
落木疏煥風秋後
瘴野屋峒人居邑
僻稀聞犬灘荒不
受魚瑞雲山色好
樓閣渺晴虛

懷潘四梅

夢向黃州訪君去
江天風雪正模糊
七年好倩荆關手
寫我扁舟憶友圖

自焦谿陸行至鎮遠府途中作

敦夙好齋詩初編

卷七

十一

七旬厭水宿遵陸辭輕舟艱哉黔中山古道阻且修上
有萬仞岡下爲百丈湫側身一失足將爲魚鼈求危棧
做荆棘亂石橫戈矛荒風作瘴霧怪鳥紛啁啾勞勞行
役人去來何時休立馬舒遠眺怒焉心多憂

宛谿橋

橋下卽
海木也

宛谿橋下水何日復西還欲問滇南路迢遙隔萬山

入鎮遠府遊中河洞

我行入鎮陽始知黔山高立馬瞻中河孤峯帶危橋亂
石盤曲峒佛閣撐岩堯仰攀雲霞表俯瞰猿猱巢巖霜

肅萬彙寒日懸層霄灑江動其下東逝非崇朝覽茲物
象殊慨彼化工勞羈懷觸蒼莽散髮凌回颿

鎮遠衛

九曲同名懸危磴孤城面巨濤獐狒安洞穴羽衛肅弓刀
放牧青蕪遠吹簫白日高滇黔此門戶諸將莫辭勞

鎮遠府

西南高極天何年施大斧擘爲萬千峯乃有蠻荒土設
險黔之東雄郡表江潯截業屏山雲澎溟灑陽雨寨穴
聯耕岬風煙接樓櫓承平數百載文物已可覩東鄰烹

羊牛北里競簫鼓飛棟何透迤奇珍自商賈當年新息
侯曾歎南征苦

吉祥寺弔甘忠果公

公名文焜遼東人殉吳三桂之難嘗殺妾饗士事見貴州

通志

古寺瞻遺象孤忠弔國殤張巡能饗士莊躡敢稱王血
灑南雲暗魂依北斗長英風猶不散鐘磬莽淒涼

鎮遠雜詩

六首
錄二

兩岸青山映畫樓長天寫出潯陽秋西風垂柳蕭蕭色
不是蠻鄉客亦愁

橙黃橘綠憶鄉關
江上霜飛客未還
但采黃花對樽酌
不知身在五谿閒

雨後登青龍巖閣上小憩

黔山表新霽
秋氣沓以高
陟巘忘嶮嶇
欽披霧縠嶢嶢飛
蕩切霄霓層閣憑
山椒下視菁煙外
萬象開沈寥
晴光動巖壑
萬木風蕭蕭
清泉不盈掬
去作沅江濤
暝色速歸客
鱗甲聞寒宵

文德關

昔上居庸塞
長城指朔邊
今來海陽道
匹馬入蠻天地

敦夙好齋詩初編

卷七

三

可九泥閉人憐磨蟻旋馳驅足詩卷奚假勒銘傳

相見坡

南征投黔郡日夜殷我憂高堂念游人關河阻且修今
晨越巖關連嶺高天浮前坡復後坡俯仰如相求迢迢
三十里晤言匪無由天梯極巘岷邃谷踏窅幽置身千
尋巔須臾百丈湫猿鳥競哀嘯藤葛風颼颼我欲招精
衛填此中央流夾道起欄檻駕空爲飛樓相思何緜緜
相見空悠悠翹首望庭闈願假黃鵠游

諸葛洞歌

并序

在望城坡南里許一名甕蓬洞相傳武侯征蠻時所鑿也舟楫難行明黔撫郭子章國朝制軍卞三元前

後疏濬民甚德之洞中有怪物狀如兕時出爲害兩岸飛巖中夾一谿復有巨石屹起中流隨鑿隨長黃平愬子去其蓬桅牽曳而上其出也稍不戒人船俱沒諺云若要此洞開除非諸葛來今崖半有郭卞二公碑記勒武侯遺象焉

若要此洞開除非諸葛來諸葛死去已千載至今鐵壁交崔巍人言灑灑大于象瞿唐五月猶可上彭城莫歎

百步洪往來不絕行人蹤懸崖沈沈控天黑怪石當關
劃南北奔流砰激聲如雷一葉乘風那可測黃平舟子
矜豪雄咫尺愁爲蛟龍得疏鑿可憐民力勞郭卞豈是
隆中曹征蠻銅鼓落何處畫象慘澹懸青霄行人駐馬
空太息側身望古中心忉子規叫血哀猿走瘴煙毒雨
逆林藪作歌誰知黔道難望城坡上休回首

別偏橋驛舍

翼日東發飛雲
巖不果遊也

咫尺黃平路飛雲不可攀客心若鴻鵠親舍渺河關未
踐山靈約休嗟旅興慳風霜思擔負昨夜夢連環